

**MARA REIH MOHCHHO ROZIE
ÂLYU LEIPAZY HE HMÂ N'AWPAH DOPA LIATA
HMÂH CHYU SUH VY**

~ A. Zakia
Head Teacher (Rtd)
Siaha Vaihpi

Mara reih mohchho rozie “**Tao awpa a châ**” tahpa tlyma, “**Tao lei awpa a châ**” tahpa a rohpa y ei ta. Chyhsa thokha ta, “**Tao awhpa a châ**” tahpa tlyma, “**Tao lei awhpa a châ**” tahpa ta ama roh. Mara reih achuna (Text Book) liata “**Tao awpah a châ**” tahpa tlyma, “**Tao awpah châ vei**” tahpa ta ropa a châ. He a chô liata mohchho sâkha rozie ânanopa ‘**awpa**’, ‘**awhpa**’, ‘**awpah**’ tahpazy he mohchho nanopa sai ama châ. He mohchho rozie ânanopa sâthôh liata kheihhawhpa he ma â do chai aw tahpa he atahmâ nota châ rozie biepipa (Principle) tawhta eimâ laichadai tua aw.

Awpa : ‘**Awpa**’ tahpa mohchho hmâzie cha he hawhta a châ –
Hrohsopa châta **awpa** a châ.
Mylâ kawmiti **awpa** a châ aw.
awpa’ = (Koh or Call, to call)

Awhpa : ‘**awhpa**’ tahpa he “tlâh-**awhpa** a châ”.
“Mylâ tlâh-rai eima hria aw” tahpa ta tlâh-**awhpa** a châ.
(awhpa = âu or shout)

Awpah : ‘**awpah**’ tahpa he he hawhta hmâ awpah a châ –
Tao **awpah** a châ.
Hria **awpah** a châ.
Tao **awpah** a châ.

“Tao **awpah** a châ” tahpa tlyma “Tao lei **awpah** a châ” tahpa rona liata cha ‘**awpah**’ tahpa mohchho, Mara text book liata rozie he â do chai. He mohchho sâthôh, ‘**awpa**’, ‘**awhpa**’, ‘**awpah**’, tahpazy he a hmâna awpah liata hmâh pado achhuah suh vy. ‘**awpa**’, ‘**awhpa**’, ‘**awpah**’, tahpa mohchho sâthôhpa he, bietlohpa (sentence) sâkha liata ama yna awpah su dopa liata sohpa ta, pamosana bietlohpa roh sih la:

“Mylâ dawh 10:00Am ta MTP member zydua, MTP Hall lia avy khai **awpah** ta **awpa** nata pahnosapa nama châ” tahpa ta tlâh ama **awhpa** a châ.
awpah’ tahpa hmâ n’awpa liata ‘awpa’ nata ‘**awhpa**’ tahpa hmâh khao lei **awpah** a châ. Mohchho nanopa ama châ.

**AIZAWL MARA CHURCH
ÂVAW DUAH LAIHNA THÂTIH CHYUPA**

Arohtuhpa :
Beirokhu Beita,
S/o Machâ BH. Sibeï,
Chakhei Vaihpi.
Camp: College Vaih, Siaha.

Târi 4 November, 2017, Pachynoh liata Aizawl Mara Church (AMC) cha Pahypa vaw châ ha ta, aly’pa a châ hmeiseih. Abeipa moh cha reithaipa ta y mawh sy.

AMC pahypa achâna zawhzi ta AMC âvaw dua hlâta Aizawl Mara Christian Fellowship (AMCF) ama vaw padua laihna dâh, ei Paw ta eina chhopachhuahpa hawhta ei vaw roh tua aw. (AMC âvaw dua laihna dâh he kô 2007 pa liana khata Kristian Tlang-au, August or September issue liata papuapa châ ha hra ta, AMCF âvaw dua nota Leader hmiatua chaipazy chhao palâsapa a châ hra. A copy deikua ei ku liata vaw y khao vei.)

AMC he târi 26 July, 2003 liana khata Local Church pitlohpa hawhta mohôh awpa ta ECM Awnanopa ta avaw pahypa châ ta, âvaw dua laihna dâh cha he hawhta a châ:-

Aizawl khihpi liata Marasaw ypa vaw pôh via laih ei ta, MSO cha paduapa vaw châ ha ta, sapa lâ liata lôhratlô kawpa ta Aizawl liata eima vaw y pathao hainona chata, thlahpa lâ dâhphina chhao thata, Marasaw thokha pathipalôh liata chi hawhta vaw rie pathao ha ta. Aizawl khihpi liata Mara reih cheingei ta Khazohpa achhy hra awpa cha khona thata lai via rili ta.

He daihti liata hmo yzie pahno viapa nata uhthei viapazy ama y thlâh tarawpa ta, anoh eih ta Mara reih ta Fellowship hnei laih awpa kha rairuna a ypa ta pahnopa châ ta, member ama chyh hleikhô ta thokha cha he liata ahlaohli ta, Leader châ awpa chhao rairuna ama hnei tahpa pahnopa a châ. Thokha chhochhi cha Mara reih ta Apakhyna hneipa châ mawh sala, sahma paripa nata chyhsa moleipazy ta eimâ pakhyna maniah ama pabua aw tahpa chihuhna nata pachâna ama hnei hrpa ta pahnopa a châ.

Anodeikua, Aizawl liata Marasaw ypa, manôh chyhta (manôh 30 chhahchhyh)-zy ta Aizawl khihpi liata Mara reih cheingei ta Khazohpa reithai awpa khopasana ama hnei hapa vâta Khazohpa lâta thlahchhâpa ta ama vaw hia tyhpa cha bâhsai hleileipa ei ta.

Khazohpa ta Marasawzy thlahchhâna cha, a chyh-ei tah leitheipa châ vei; târi 3 March, 1980 liata Mara Christian Fellowship(MCF) cha, Puhpa Nahlo Solo O, Republic Vaih, Aizawl liata padua theipa a vaw châ haw.

Aizawl Mara Christian Fellowship a vaw paduatuhpazy nata ama chânazy ary liata palâsapa a châ:-

President = B.H. Sibeï
Vice President = Siakao Chozah(L)
Secretary = FC. Thama
Asst. Secretary = B. Philip
Fin. Secretary = Nazi
Treasurer = Nasi

He nahzy Advise pietuh awpa ta ary liata moh rohpazy he Adviser châta raopa ama châ.

1. Nahlô Solo
2. K. Zeiko(L)

He hawhta MCF paduapa a vaw châ ha tawhta Private (Nahlo Solo nata Siakao Chozah 'L') O zy liata a vaw pakhy thlâh tyh ei ta, he he âsu thai leipa vâta amâ pakhyna awpa su cha thlai patluahpâ lymâpa a châ. Vâhnei chhih kawpa ta Modern High School, Near Bazar Bungkawm liatahpa cha Apakhyna su châta pasaipa vaw châ ei ta, he khai tawhta ryhpaoh viana vâta Aizawl Temple, Salvation Army nah Achhyna O lâta amâ pasie. MADC sawhkhâ ta Aizawl liata Mara House hnei hra awpa ta

ryhraona vaw tao laih ta, ryhpaohna chaleipa ta Aizawl Temple tawhta Mara House, Republic Vaih lâ cha amâ pasie heih.

Aizawl Mara Christian Fellowship cha, kô 23 tlai uhtheipa vaw châ ha ta, apalâ kawpa ta siekheipa a vaw châ tawhta khizaw hmahsiena nata Marasawzy Aizawl liata sawhkhâ rai hriapa nata achuhaipazy ama pôh lymâ vâta târi 16 June, 2003 liana khata Aizawl Mara Church tahpa ta padua awpa ta, Tourist Lodge, Chaltlang liata pathlupa a vaw châ. Târi 26.7.2003, Pachynoh dawh 1:00 PM pa ta Tourist Lodge Conference Hall, Chaltlang liata Aizawl Mara Church cha ECM Moderator Dr. Rev. K. Itei ta a pahy.

AMC âvaw dua no ta Church Leader(Adhoc) châta raopazy:-

1. **Biatuh Pastor** – Rev. K. Laichhua Azyu
2. **Awnano Hyutuhpa** – Machâ Zakhu Hlychho
3. **Chairman** – Machâ Hiphei
4. **Secretary** – Machâ Vâbeihâ Hlychho
5. **Asst. Secretary** – Machâ J. Rawna
6. **Finance Secretary** – Machâ Dr. K. Robin
7. **Treasurer** – Machâ S. Pâ-aw

AMC ta Achhyna O eihrâhpa hnei awpa ta khona ama hneipa cha Awnano member zy phahnai ngiahna nata tiamana vâta Abeipa ta thata byhnâ pie ei ta, atahmâ cha huhieh kawpa ta Marasawzy châta apakhyna awpa, Mizoram State Capital, Aizawl liata Abeipa Achhyna O pha ngaitapa â vaw duah haw.

Aizawl Mara Christian Fellowship avaw paduatuhpazy ta Private O nata Awnano hropazy Achhyna O ahlâh laiha ta avaw pakhy tyh ei ta, Achhyna O eihrâhpa hnei hra awpa ta ama mothlaw liata achâhpa nata ama saduthlienazy cha Abeipa ta hlao patloh laih lymâ ta, atanoh he, chhâ vaw y awpa zydua liata alei thai khao lei awpa a châ tah thei awpa ta Aizawl Mara Church cha paduapa a châ hleikhô ta, Achhyna O pha ngaitapa chhao pahypa a vaw châ haw. Marasaw zydua ta alyleipa eima y nahta pangiasa achhih vei. Eimâ lynazy cha Abeipa liata tlao châ hri sala.

Aizawl liata Marasawzy châta Achhyna O eihrâhpa hneitheipa a vaw châ hapa he AMC chhituh hmiatuapazy hriapasana nata thlahchhâ tiamana vâta a châ tah leithei awpa châ vei.

Atanoh, Aizawl Mara Church Achhyna O pitlohpa, chhâ khazie tlai ma adaih awpa nata O rônah ngaitapa pahyna daihti liata Aizawl Mara Christian Fellowship chhituh hmiatuapa, maniah hrolâh thlâhpazy nata leirâh maniah khôsai hapazy ama hmia hmô awpa y vei hra sala, maniah hrolâh thlâhpazy ta atanoh he mothlih chi chhao ta Abeipa lâ alynabie ama reih hra nahta pangiasapa a châ.

Aizawl Mara Church he, Abeipa ta byhnâ pie via rili mawh sy.

Dinô chhithai nô

~ T.T. Assapaw, Châkhei

1. Vâti ei hrialâhpazy hry lia,
Seihnai nâ dei he na;

Hrozô akaolâh awpa ta na,
Pawmaih nâ ei châ tlyh.

Dinô (2) Chhithai nô y,
Nâ vaw hnia la;
Dinô (2) Chhithai nô y,
Nâ vaw hnia la.

2. Lyuhbie ei hlâ hapazy hry lia,
Seihnai nâ dei he na;
Khôpheih nâ kialâh awpa ta na,
Pawmaih nâ ei châ tlyh.
3. Kaolâh ei hnei hapazy hry lia,
Seihnai nâ dei he na;
Vyhhai na hailâh awpa ta na,
Pawmaih nâ ei châ tlyh.

Editorial:

Noh nata daihtizy cha ti lohpa hawhta sie lymâ ei ta, kô 2017 cha siesaipa ta kô thiehpa 2018 eima tlô ha heih. Chyhsa hluhpi ta he kô thiehpa 2018 he tlô awpa angiatiah rarai leipa ta hâ hualuapa ta ama sai nota, thina lytlâh khôpa ta a tlô thei khao leipa hluhpi ama y hra thlyu aw.

Atanoh he kô thiehpa na tlô theipa he khâpa vâta ma a châ tahpa na pachâpasia beih hra tlyma? Nâma thatlôna nata sasyh â vaih thai kaw vâta nata nâ mohôh thai kaw vâta a tlâhbohpa ta a y theipa hawhta nâ pachâ khihta la na pachâ chhei kaw aw.

Hrona nata thina he chyhsapa khozie hawhta a y thai awpa rimâ châ leipa ta, thina he chyhsapazy tawhta keihkha ta deita âhlapa a châna chôta a ngiachhiena nata kyhpachâna to lymâpa ta kô thiehpa maniah a tlôkheituhpa eima Beipa nata Pachhatuhpa Zisu Krista hnohta alynabie reih chy u ei suh u.

Kô a sie chiehpa liata na hmotao chheina hluhpi chhao a y thei aw, rân châta nata Awnanopa châta hmotaopa chhao na vaw hnei lei thei ngyu'na. Atakô kô thiehpa he nâma châta daihti thiehpa châ ta, hmialâ na pangai n'awpa liata lâthlôh thiehpa achhih awpa na hnei tahpa my leipa la, he kô 2018 liana heta Mararâh nata Awnanopa châta khâpa hema ei tao thei hra tahpa pachâ lymâna chôta, pheiliai haih la, pachâna hmâh la, thatlôna thiehpa ta a tobi la, na chaihrai cha patiah pathi mah y.

He rân heta na hmopha tao awpa cha hâ ta, Awnanopa ta keih na chakâ awpa angiatiah lei kawpa ta a cha mokhâh ngâthlâh ha tyh tahpa pahno la, heihzy ta ama tao theipa cha na tao thei hra tahpa my leipa la, palôh thiehpa, pachâna thiehpa nata tha thiehpa ta he Mararâh nata Awnanopa châ heta keih cha vaw chakâ tly;ai hra tua mah y.

EI NAWHTA Y !
~ Colin C.Ngôhai



Ei nawhta y! He hawhta daihti phapa hneipa ta ei palôhrupa hmeiseihpa zydua cha chho thei awpa ei châpa he ei ly ngâsâ.

Khazohpa ta khizaw avaw tao noh tawhta a chhôn liata a pahrâpazy hry liata chyhsapa he chônôchai awpa ta maniah a vaw tao. Khazohpa ta khizaw nata a chhôn liata a pahrâpa zydua cha chi pathla ta pôh lymâ awpa ta byhnâ aw ta. Khizaw chyhsazy vaw pôh viapa ta, he khizaw lia heta a vaw pihpa eima châ. Hlâno chyhsazy thâtih Khazohpa châbu tawhta eima hmôpa hawhta, eima râh ryu a reihtuhpazy he Khazohpa ta a vaw raopa ama châ. Chavâta *ei nawhta y!* eima râh noh nata daihti a kaw sie lymâ awpa liana heta eima chi nata râh arao awpa nata arao ngâhaipa pado/taopathi theituhpa ei châ hra na, tahpa nâ pahnopasia thlâhna chôta, bie ei chata chanei khohpa he, na palôh phiapa liata roh ha la, kheihawhpa su liata na y no chhaota khâ nâ thei thlâh hâ awpa ta ei khoh.

Khizaw chyhsa reitiah lei zydua hry liata, nâma he chyhsa pakha ngâlâh na châpa a pahno pasia via rili la, nâma hawhpa he pakha hmahta y v'ei tahpa pahno mah y. Kei na uhtapa hlâta duahmo â sah viapa ta na y thei n'awpa ta ei khokheina ei cha hlâ. Na chyh via no tawhna khata na viasazy hry liata chônô viana (specialized) na hneipazy kha nâ palysatuhpa a châ tahpa my beih va na. Chavâta, ei cha chho awpa he, na palôhru hmeiseihpa ta nahthlie la, hmâhpazao lymâ ha mah y.

Ei nô nata paw zy ta, heihzy eima lyu thei n'awpa nata eima pitloh tawh chhaota eima khihsa-tôhtuna awpazy maniah pachâkheipa ta, hnei thluna vâta châ leipa ta, riethei taona chôta siku maniah za pakiasa ei ta, chavâta he hawhpa daihti phapa na hnei nona heta, tiama papua mah y. Atanoh ta hmo thiehpa (new things) nâ chupa liata na thaipa cha, pahno pasia a chhuah la, my khao khah y. Class na kiana daihti lia chhao, na viasa hropazy hawhta y chakhyh leipa la, na hyutuhpazy rei a ngiah la, na palysa awpa ei a châ. Na hyutuhpa palysa n'awpa cha pachâ mah y..Kheihawhta e na palysa aw? Hyutuhpa ta châ athai theipa hawtizy chô liata aly ei ta, cha hawhta athai theipazy cha âmo a palysatuhpa ama châ tyh. Class chhôn liata chhorupa nata reingiah leipa ta, class zy arâparuna taih ta na tlô khia cha, uniform chhao ta kheihawhpa su chaki viana liata tlyma, chhônkhâ nata unawhzy hmô riah chipa ta anyu aw chi ta, na zachhihna kha na pahlei pathao haw tahpa â pahno mah y. Cha hawhta a ypa, chyhsa hlaotlohpa y beih vei ei. Cha hawhpa tlâh leina hri cha eima râh liata hlüh kaw ta, na pasa hlâta avaih ha mah y.

Hmo a vaw chu via laih aw chi ta, pitlohna lâpi liata na kaw sie laih lymâ awpa a châ. Khazohpa khokheina nata byhnâ vâta eima râh khôtho (*other states/countries*) taihta na vaw sie awpa a vaw châ ti ta, a pachâpasia via heih teh. Nô nata paw, unawhzy hmô leina liata na y tita, na daihti hmâpa nata nâ tyu nâ duana, na nie nata dozy âvaw nano khai ha aw ta, cha tita cha na khopa maih taopa ta doh thei aw chi ta, na yna chhâpa nata na tao awpa (duty) pahno pasia ha la, chi hropa kiah liata a ypa na châpa vâta, viasa nâ tao awpa a châ. Chi hropa viasa a pakyh la, hrophapa nata ziephapa na hmôpa maih achupa ta la lymâ mah y..Bei châ hmia a pasapa nâ tyh ti ta, ama hry tawhta tleisai ha mah y..Education ta âchhuahna atheipa ta nâ chuna bu ngâlâh chaleipa ta viah reih/reih hropa chhao thai a chhuah cheingei la, ama reih na thai kiah viasa hluhpi hnei aw chi ta, chazy hry tawhta hmophapa thata nâ chu thei aw. Hostel liata na yna daihti liata na hyutuhpa na palysa kiah rairuna a tyh beih aw va chi. College na kiana daihti tawhna heta daihti peimawhzie he patu a chhuah la, a daihtita liata hmotao lymâ mah y. Student activity liata apahlao hluh la, phu nata pyh lia chhao ahmâh mah y..Châ nâ chu daihti chhôn he ato nâ chuna daihti châta leadership achuna daihti pha kawpa chhao a châ tahpa na pahno awpa a pha..Châhrasala, cha zydua hry liata eima râh ta raihria awpa ta a châ hnawpa nata peimawhna a cha hneipazy he my leipa la, chi nata pho, râh châta chyhsa phahnaipa châ awpa ta nâ chuna cha na thai (passed) awpa a châ.

Khazohpa ngiachhiena nata byhnâ topa ta na kaw patlô tita, Mararâh khôtho râh hro su hro, khôtho tawhta na nakhaoh ta na thei tyhpa kha, mokhaoh ta hmô ha aw chi ta, na râh chyhsa thyutliapa nata viasa hropa zy hawhta, thlalôhpa ta na y awpa châ vei. Eima râh arao ngâhaipa he thata châ ta, nâma deita cha taothei ngyu aw va chi, châhrasala chyhsa adona apasâhsapa avy aw ta a cha vaw bao aw. Politics he â dopa ta a sie kiahtha cha eima râh a tlâh aw!. tahpa na pahnopâ vâta, na siena lâpi liata atyh aw chi ta, cha daihti liana chata, tlâ siesai leipa la, hmodopa hmôpasiana chôta aduah la, mohpasia la, taopathi abyuhpa cha thlai ta tao thei awpa a chhuah mah y. Chyhsa âdo leipa ta châ dyuh aw ta, adona cha pahnie beih aw veih ei, tahpa pahno teh. Phuhlana ta raihria achhuahpa cha apahno thai leipa vâta ngiachhie â chhih ta, a chô liata a vaw tlô awpa pahno sala cha tao aw vei. Marapa he ku raihria ta nie atluapa eima châna athei thlâh hana chô ta, ku raihria ta nie atluapazy cha bao la, châhrasala, thathipa nata haiphiahpazy ta eima râh luh penawh liata chyhsa thâchhie areihpa chyhsa na hmô tita, pathlie khah y. Hmodopa a pahno pasia thei n'awpa ta, a novâhna taihta chho ha mah y. Eima râh sawhkhâ pha tupa vâta a râh chyhsa, a chyhchaipa tawhta a laichaipa taih thathina zôh ta maniah chazie khai ha ta, dusawta ta pathlâ lyhlia eimâ chhuah awpa a châ.

Ei nawhta y, nâma nata keima kiah liana heta chi hropa ama y tahpa my khah y. Marapasaw pi he sôhpaliepa ta nie atlua awpa chi eima châ ma tahpa deikua hiahhrina na tao kiahtha la, apasi kaw awpa vâta, nohhro ta tlo eima reihheih awpa ta â so ei sih la. Khizaw sôh vâta eima râh liata sôh a paliepazy he maniah a disao awpa hry liata amâ hlao na tahpa na my awpa châ vei. Na nô nata na paw, uhta nata hlâta uhthei viapazy yzie nôchâ nata ama pasyunazy nahthliepa he novâhna a châ.

Eima râh liata thyutliapazy raihria awpa hluhpi â lâ leina liata âpabupa he thaoh papua achhuah la, chyhsa hropazy amopâ tlâh châ awpa ta raihria tiama mah y. Hmopha taona liata byhnâ y ta, Khazohpa bie chhao ta ' *Hmopha tao awpa pahno thlâh hapa ta, a tao leipa cha, chyhsa moleipa a châ* ',(Zami 4:17) tahpa eima hmô. Beinô chavah na khôsai noh maih liata na râh athei thlâh ha la, a chhôn liata na y tita eima râh châta raihria mah y!! Na siena awpa lâthlôh liata aphapa ta na sie via thei lymâ n'awpa ta châ taotuhpa na Khazohpa cha my leipa la, Khazohpa chata BYHNÂ cha pie mawh sy.

**Eima Mara Missionary
chhôkhazy lâta tao awpa ta
ei khoh kawpa**

~ J.B. Khaisia

Reih awpa chi a châ ma, châ vei ma tahpa chhao pahruapahmy thai leipa na ta, zawpi pahnopu ta areihpa châ' sala, nôpaw bieso ta, I amôpa pahrapa hawh ei châ tlamaw haw vâ tlyma tahpa ngiarohna na pahneisa kaw taraw tlôh, anodeikua ei palôh liata alâ ngâthlâh haw a tahpa bao naihta, ahy peina ei hriahraoh ma tahpa ta a maohlah a pachâpa ta a vaw reihpa châ na ta, eina vaw pahnokhei thai awpa eichi ei khoh kaw.

Marapa pi heta, sapa nata thlahpa liata Khazohpa byhnâ cha eimâ phuhleina taih eima to chaimâh tahpa cha chyhsa to pahnopu a châ. Awnanopa liata eima nôpawzy ta eima Missionary nawh palôh pasasa haw pi ta, chavâta ngiahthaina eimâ h'awpa a châ tah ei ta, ama sawchanô, Pihno Vaili & chhôkhazy chhaota thlahpa kyh liata nôpaw châdâh thai kaw ei ta, miah amâ ngiahthaipa dei âdaih tah leipa ei ta, byhnâ zy chhao miah ama awpa a vaw châ.

Anodeikua, Rev. R.A. Lorrain nata Hiakha DC zy Beinô Pâkao liata amâ tyhpakhy daihti no ta Nochhi Mara beizy ta R.A. Lorrain pathlahla (Apaphasai) ei ta, R.A. Lorrain palôh eima pasasa kawpa deikua khala kheihtha tao n'awpa y leipa ta, a peikawpa ta ei pahno. Tanoh liata pachâ sualuah tyh na ta, a pei tahpa hleikhô ta, tao n'awpa dâh pahnothai a ru kawpa a châ he zaw.

Chakhiahta la, keimo Marapa sawzy pi ta eima Missionary nawh chhôkhya lâta khâpa eima tao hr'aw vâ i? Ama mahnô nata mahpawzy mawh la rônahna râh lâta miah adisai khai haw hra ei sala, ama samohnô (Ama sawchanô) pihno Vaili nata âvahpa Rev. L. Mark zy miah hrolâh chy ei ta, eima vâhnei kawpa ta ei pahno. Achhâpa cha Pihno Vaili miah a hrolâh chy no heta, ama chhôkhya lâta alynabie rei n'awpa ta hmo miakha chhâ eima tao hr'awpa a phapa ta ei pahno. Atakô (2017) he MADC MDC General Election hnei kô châ chho ta, âryhpaoh kawpa ta ei pahno.

Eima pahno chyupa hawhta Pihno Vaili nata Rev. L. Mark zy he cha, machâ lâ châ ha bâ ei ta, tlaichhai kaw hr'ei sih la, ama tha nata zâhzy nata ama hnatlâna zy he pha âh khao leipa ta, chavâta ngiabâh hr'ei sih la yzie hnei leipa hawhta pachâ sih la, ama vyuhpa ta ama sawchapaw zy y chho ei ta, chavâta ama sawchapaw zy hry tawhta pakha he, atkô MDC atlyhna liata kheihawhpa Party rai ta sawhkhâna a taopazy ta, Nominated MDC seat kha cha reichhyh (Patosa) thei ei sala tahpa ei khoh kaw cha maw ! He pahruana hawh heta takô (2017 AD) liata MDC atlyhna liata sawhkhâna a taopa Party zy ta, Pihno Vaili sawchapawpa hryta pakha he Nominated MDC seat sâkha saihei thei ei sala cha, Abeipa Khazohpa ta Mararâh Missionary pathlasy chôta eima hmotaopa he a palôhtlâh aw ta, eima râh he tlâh aw ta, sapa nata thlahpa liata chhao byhnâ eima to via syulyu nahta ei hnabeiseih kawpa a châ.

He ei reipa vâ heta ahyzy ta ma cha ama khozie nata pachâzie a châ leipa ama y thei aw. Anodeikua la, mopakha chhâta cha âdo tahpa ama y thlâh ha hra nahta ei hnabeiseih kaw. He pahruana he biechhâna châ leipa ta, biechhâna a tao theituhpa cha MDC atloha sawhkhâna a tao theituhpazy ku liata â pahniehpa châ ta, Mara zawpizy pi ta duah nama vaw pachâ pazi chy awpa ta khoh kaw na ta, ei châ haw ei. He he Political Party zy maochhiena tlyma. Nô-una tlyma vâta reipa châ leipa ta, eima missionary hnôh chaipa, Pihno Vaili he, Marapa zawpi vyuhpa ta MADC Election liata sawhkhâna a taopa, Party zy heta Present châta Nominated MDC Seat, seat sâkha he a sawchapawpazy hryta pakha pie thei ei sala, tahpa khona a châ tahpa pahnokhei awpa ei khoh kawpa a châ. He he Mararâh tlâh n'awpa nata byhnâ eima to n'awpa hnawh a châ awpa ei hnabeiseih.

Ei reihpahsi kawpa a vaw châ khiahta la, Mara zawpi zydua nama ngiahthaina ei châ haw ei.

FIFA WORLD CUP BALL HISTORY

Atakô 2018 he FIFA World Cup kô a vaw châ ha heihpa vâta, World Cup hmiatuapazy liata ama Ball hmâpa thâti h eima vaw palâsa tua aw.

Kô 1930-liata World Cup amâ khaih tua chai nota ama ball chapiepa nata tahmâhlâ World Cup-liata ama ball hmâpa kha thliepakhopa chi châ leipa ta, tahmâ cha âsosâh ngâsâ ha bâ. Apachaipa ta he, Pele, Lionel Messi, Cristiano Ronaldo, Neymar, Wayne Rooney, James Rodriguez, Andrea Pirlo, Sergio Aguero, Phillip Lahm, Mesut Ozil, Karim Benzema nata Steven Gerrard zy chhaota ama reithai kaw. World Cup hmiatuachaipa liata ama Ball hmâpa kha chhie kaw hra sala asôh kaw lah y. Ball taona kyh lia heta Company nahzy chhao azaoh ngâsâ ha ei ta, châhrasala World Cup lia heta cha Adidas heta ryu ama reih. World Cup-liata ball ama vaw hmâh chiehpa zydua cha he he a châ :

1930- T SHAPE & TWELVE PANELS

World Cup hmiatua chaipa liata ball Sâno hmâpa châ ta, 1st half nata 2nd half-ama hmâpa alyu vei. Ama ball hmâpa miakhapa T SHAPE amoh hawh tlai ta, a panel cha T hawhta y ta, miakha viapa Twelve Panel chhao he a moh hawh tlai ta, panel 12 a hnei. He ball mianopazy asosâh kaw hra vei sala, World Cup history-liata ama chapie pa goal tua chaipazy ama châ lah y.

1934 – FEDERALE 102

World Cup ei 2 liata ama ball hmâpa Federale 102 he World Cup hmiatua chaipa liata ama ball hmâpa nahta anano tu hlei leipa ta, biehchhyhpa pyly châ ta, he ball heta panel 13 a hnei.

1938 – ALLEN

World Cup eino (2) amâ khaih chiehpa liata ama ball hmâpa nahta anano tu hlei leipa ta, he ball taotuhpa company moh phaoHPa ta Allen tahpa he ball ball moh châta bipa a châ. A kô hmiatuapa nahta anano hluh hra vei sala achapie âthlâzi viapa a châ.

1950 – SUPER DUPLO T

He kô World Cup he Brazil liata a y tua no tahpa kha châ ta, ama ball hmâpa liata hmahsiena hmô awpa y ta, World Cup hmiatua chaipa Uruguay râh liata ama hmâpa hawhta T Shape châ heih ta, panel 12 a hnei hra. A kâ ama pazâna liata a biena a sia kawpa ta âlâ khao leipa ta, tahmâhlâ ball hawhta valve hmâh pathaopa a châ hra.

1954 – SWISS

He ball heta panel 18 tlai hnei ta, a tlôtuHPa Switzerland moh phaoHPa ta Swiss tahpa a châ. A ball lia chata 'Swiss World Champion Match Ball' tahpa âchhuh pâ hra.

1958 – TOP START

Sweden-in World Cup ama patlô nota ama ball hmâpa he Top Start tahpa châ ta, a kô hmiatuapa liata Swiss nahta ânano hluh leipa ta, anodeikua he no heta ball rôh sâno hmâpa a châ

1962 – CRACK

Chile-ta World Cup ama patlô kô lia heta hmahsiena hmô awpa y heih ta, panel sâkha ta ki charie a hnei hra. Kô hro tahpa zydua hlâ ta âhua via ta, kô hmia tuapa liatapa hawh pyly ta bladder a hnei heih hra.

1966 - CHALLENGE

He kô World Cup he England-ta ama patlô kô kha châ ta, tawhta he World Cup lia heta ama champion pâ hra khawh. He kô liata ama ball hmâpa he “Challenge” tahpa ta bipa châ ta, kô 1958-liata ama ball hmâpa Top Start nahta âlyu kaw hra. Tawhta he ball he adidas company taopa châ leipa World Cup-liata ama hmâh hnôh chaipa a châ.

1970 – TELSTAR

He kô tawh heta Adidas chata World Cup ball tao raihria pathao ei ta, ama tao tua chaipa he a moh châ ta Telstar tahpa a châ. Black and white television ama hmâh chypa vâta âlâ pasia via thei n’awpa ta arôh he avyhpâ nata arâhpâ ta ama tao.

1974 – TELSTAR & CHILE DURLAST

Germany-ta World Cup ama patlô no heta Telstar pyly chapie heih ei ta, he hleikhô heta Chile Durlast ama chapie hra. Telstar he ‘classic design’ tah pachâpa hawtizy liata nata cartoon taihta he ball hawhta âchapaipa he ahluk ngaita. Chile Durlast deikua arâhpâ suapa a châ.

1978 – TANGO RIVER PLATE

Argentina-ta World Cup ama patlô kô ta ama ball hmâpa he Adidas taopa pyly châ ta, a moh châta “Tango River Plate” tahpa châ ta, kô hropazy hlâta a design anano ta, a quality chhao asâh ta he ball he pound 50 mâpa a châ. A daihti no ta ball mâru chaipa a châ.

1982 – TANGO ESPANA

He ball he a patlô tuhpa Spain moh phaohpa ta “Tango Espana” tahpa châ ta, Tango ball hropa nahta anano hluh hra vei sala, a quality a pha via.

1986 – AZTECA MEXICO

He ball chhao he a patlô tuhpa Mexico moh phaohpa ta “Azteca Mexico” tahpa châ ta, he kô lia heta design thiehpâ hmâpa châ ta, chapie pha ta, âhua pha kaw hra, âvaw sosâh via lymâ hra.

1990 – ETRUSCO UNICO

He ball he World Cup 1990-liata hmâpa a châ hleikhô ta FIFA apyhkheina ta Euro 1992 liata hmâpa châ ta, khopahâh kawpa ta taopa châ ta, a tobina lia heta Estrucan chakeihbarôhneipa luh sâthôh tawhpa a châ.

1994 – QUESTRA

He ball lia chhao heta hmahsiena hmô awpa y heih ta, ball he âzaw chatlie hleikhô ta ti angia thei lei awpa ta apaha kawpa ta taopa a châ. A patlô tuhpa he khizaw liata chyhsa hluhpi ta râh rônah chaipa ta ama pachâpa United States a châpa vâta a quality chhao he âsâh patlua ngaita kaw ta, final-liata ama ball hmâpa chhao US Center Museum liata ama soh thlâh haw.

1998 – TRICOLORE

EURO 2016 patlôtuha France-liata ama ball chapiepa Tricolore he colour sâ 2 hlâta hluh viapa eikha ama hmâna châ ta, a design he 1978 nata 1982 World Cup-liata ama hmâpa Tango nah khata â lyu pâ. He ball he 20th Century liata cha khizaw liata ball pha chaipa ta reipa a châ.

2002 – FEVERNOVA

He kô World Cup he khizaw liata continent lai chaipa Asia-liata râh 2 zy ta ama patlô khohpa vâta he kô tawh heta Tango design cha sie pakhô ha ei ta, South Korea nata Japan-liata ama ball chapiepa he a moh châta “Fevernova” tahpa a châ. He ball heta layer sâthôh hneipa ta a rôh nata a tobi dâh hrahro he ball hropazy nahta cha â lyu lei kaw.

2006 – TEAMGEIST

World Champion Germany râh liata ama ball chapie awpa he Adidas Innovation team nata Moleten Corporation design châ ta, hmahsiena hmô awpa y heih ta, panel 32 hmâh khao leipa ta panel 14 ngâlâh a y bâ hleikhô ta abiehna chhao hnei khao hra vei. He ball he German player zy ta chapie paphasa kaw ei ta, ama hmâh thai kaw hra, châhrasala vâduachhih kawpa ta semi-final-liata ama tla ha khawh

2010 – JABULANI

He ball he South Africa-liata ama chapie tawh khata pahno leipa y thlyu veih ei. Mizoram liata chhao âlâlauh kaw. Teamgeist nata Jabulani he âlâ dâ âlyu kaw hra sala, atao dâh deikua alyu chyh kaw ta, player zy châta chapie apha via thei n’awpa ta taopa châ ta. A ball he âhua dâh adaih thai kaw ta, World Cup-liata goal pangia theipa German star Thomas Muller chhaota reithaipa ta ama râh liata ama chapiepa Teamgeist hlâ khata chapie huhno âchhih via zie a reih. He ball he apha zie nata a sôh zie âlâpasiana cha final-liata Spain nata Netherlands amâ su no ta minute 116-na liata Spain player Andres Iniesta-ta ama tlôna goal a pangiapa ball kha pound thy hlei ta ama zuah ha khawh.

2014 – BRAZUCA

He ball he kô 2014 World Cup Brazil lia khata chapiepa châ ta, “Brazuca” tahpa he Brazilian zawpi ta amoh ama bipa châ ta, Brazilian ama châpa amâ palaina bie a châ. He ball tao n’awpa heta kô 2 nata a khophie tlai mopachhi n’awpa ta hmâpa châ ta, ball hmiatuapazy nahta ânano ta, a ball sie dâh âdopa vâta nata âhri dâh â daih thai kawpa vâta World Cup âkhaihpâ Player hluhpi ta ama reithai kaw. He ball he tahmâ cha khizaw liata alâlauh chaipa châpa ta league nano nanopa liata hehawhpa design hmâpa châ ta, “BRAZUCA” he khizaw liata ball asosâh chaipa ta reih ngâhpa a châ.

KÔ THIEHPA BIETAPA

*~ K. Vanlalliana,
Secretary, BML & DCEO,
MADC, Siahâ*



Khazohpa ngiachhiena nata chhihthana vâta kô thiehpa 2018 cha vaw tlô thei pi ta, aly'pa a châ ngaita kaw. Eima thlahchhâna nawh ngaitapa achyh-eituhpa Abeipa moh cha tlyzaw ta reithaipa ta y mawh sy ! Eima Magazine Hla nata Bie pasô ta latuhpa zydua eima Beipa Zisu Krista mohta Kô thiehpa anaohna sôhchaipa ei cha hlâ ei.

Kô 2018, kô thiehpa heta sapa nata thlahpa liata byhnâ hluhpi cha vaw tlôkhei ei sala, thlalôhna nata sivâphana chhao cha vaw tlôkhei tlai mawh sy. Tiamana nata phahnaingiahna chôta nama hmia liata tao awpa a ypazy hlaotloh kawpa ta nama tao lymâ thei n'awpa ta khokheina sâh chaipa ei cha hlâ ei.

Sapa nata thlahpa liata kao totie liata hmahsie awpa ta cha sona nata novâhna angiah ngaita kaw pi ta, cha sona novâhna cha Achuna (Education) tawhta hmô theipa a châ. Chavâta achuna he pachâ peimawh ei sih la, achuna liata eima hmah a sie khihta cha kao totie liata eima hmah a sie aw. Râh khochhihpa eima châ thei n'awpa ta Education liata ahriatuhpa nata Pachutuhpazy eima châna hawhta eima zydua ta phahnai angiah via ei suh u.

Atakô 2018 Academic Session thiehpa châta eima target chai awpa ei khopa cha keimo ta apha kawpa ta pachu thei thlâh ha pi ta, khazia maw eima vaih / khih sawzy ta phusâ hluhpi hryuhpa ta Private siku ama pangai tyh, keimo Siku chyu liata pakiasa bâ ei suh. Chahawhpa châta cha eima taozie phaleipa nata eima diathlânazy a y khihta cha thypathlah ei sih la, mohropa châta byhnâ châ achhuah chyu heih suh vy.

Machâ reih

Viahpa châdi	: Châpaphaopa
Veih dô	: Palôh hmeiseih leipa, dôveipa
Vâchhiepa	: Athi hapa reina
Zaizyh	: Yzuapa
Zamali	: Zawpi, chyhsa hluhpi reina
Zawlâ	: Zawpi siena lâpi
Ziahziroh	: Sidia, dâhrolo
Zasia	: Satlia laihsa khopa
Chaoza	: Sawhkhâ
Thaidao	: Chanô chapawhpa
Vapô	: O, ochhôn, tlyliah

Krista Lôpanô

~ N. Lybei (L)

1. Krista ngiapâthpazy sai h u,
Sâtâ chariah ta nohto miah tei hai ta;
Tiah thei awpa ta chariah chhaichhizy la la,
Pahnietuh châ awpa ta nohto amâ teh.
 Krista châta lôpanô lia aduah lymâ teh,
 Bie hmeiseihpa tawhta pavia sai khao khâ;
 Nohto na hro liata Krista Beichai mawh sy.
2. Bie hmeiseihpa lia ypazy cha,
Molei chariah ta pahnie thei khao vei;
Alyna nata thlalôhna ta bie ei ta,
Chyhsa hropazy cha kyhpachâna hnei ei.
3. Lôpanô lia O sapazy cha,
Thlihpipazy ta parao thei beih veih e;
Ti laipazy ta parao thei khao hr'aw vei,
Bie hmeiseihpa lia ama ypa vâta.



**TISI KAOPI Châbu
Palâhâhna hnei**

Târi 24th Phiapi, 2017 liana khata Puhpa Ng. Phosâ châbu ropa, ‘TISI KAOPI’ tahpa cha Puhpa K. Vanlalliana, Secretary BML & DCEO, MADC ta zawpi rei thei awpa ta MADC Forest Hall liata a palâhâh haw.

He palâhâhna daihti he Puhpa Laicho Nôtlia, Vice Chairman, Board of Mara Literature ta pahnie kawpa nata thai kawpa ta chhihtha ta, Puhpa A. Zakia, National Awardee ta thlahchhâna ta daihti pavaosana hnei ta, châbu sai chhieliena daihti he Puhpa Z. Siachô, Adviser, Mara Writers’ Club ta thai kawpa ta âhmâh hra. Laihsa Jessica B. Khuhly ta thai kawpa ta hlasapa ta zawpi palôhpahawh ta, zawpi pôhpakhypazy ta amâ ly ngaita kaw.

Puhpa K. Vanlalliana ta he châbu palâhâhna liata a biereipa tlâhpi cha he hawhna heta a châ.

“Abeipa ta Marapazy maniah a khokheizie he a rônah tah na ta, eima pahrâna Mararâh he pachâ tua ei sih la, tlâhsâhpazy, chavah laipa nata chyhpa, râh bypa yna su, zilih phana nata râhmâhpa nata râhsa hluhpi yna râh a châ. Hezy heta hla nata bie pha kawpa hnei chyui ei ta, cha hla nata bie pha kawpazy cha Literature pha kawpa a vaw châ tyh.

He hleikhô ta eima râh chyhta liana heta hmo ypatluapa nata ngiatlâh a châ kawpa, pamosa n’awpa ta lôpu, lôkâh, saopi, lôkhaoh nata ahropazy hluhpi y ei ta, cha hry liana chata a tahmâ ta Tisi Kaopi chhao he â hlao hra.

‘TISI KAOPI’ thâti h nata a chheipâh liata hmo ypa nata a tlôpazy thâti h he a rei pha kaw awpa ta a châbu taihta taopa a vaw châ. He zydua he a rei phana ngâlâh liata eima palôhru pachhò leipa ei sih la, Literature châta eima râh leilô thyukheipa nata pizie ta eima literature hmah a pasiesazie he eima pachâ pazi awpa ei khoh kaw.

Puhpa Ng. Phosâ chhao châbu hropa roh via lymâ awpa ta khokheina sâh chaipa ei hlâ hra. Ei châ ly kaw ei.

UNAWH PATHÔH
MARAPA CHARIAHZY

~ NG. Phosa, Tisi
(August 2015)



Marapa zy pi he hlâno mahnô-mahpaw daihti no tawhta chariah a vaw hnei tyh hrapa nata abei, lahpi-saw nata khihtlâh châta thi ngâhna taihta riahpha ngaitapa ta chariahzy a vaw dyuh tyh hrapa eima châ. Achâhta pahniena eima to daihti y ta, pahniepa ta eima y daihti chhao a za y tyh hra.

Kheihawhpa rai châ sala, chyhsa hmiatuapazy kha a ma palôhrupa tlokhuh ta lahpi nah saw, abei nata khihtlâh châta amâ piena nata kyhpachâna hmeiseih hneina chôta chariahzy hmia ama vaw chhy ngâhna kha za achhih ta, chhôhso lôhlia my thei’pa rimâ châ vei.

Atanoh deikua cha hlâno daihti liata chariah hawhpa zydua kha Abeipa eima Khazohpa ngiachhiena zawhzi ta hnei hraoh khao ma pi. Khazohpa bie hrohpa châbu ta, eimâ piapa zy he sapa nata thisaih châ tlôh lei khâh ei ta,.....thlahpa moleipa sahlao a ypa zy tiao a ma châ, a tahpa hawhta atanoh Marapazy pi eima hmiahaopazy nata chariahzy cha â vaw nano ngaita kaw bâ.

Rei chiehpa hawhta Marapa pho he luh la hmâhpa, chyhsa riahphapa nata thi ngâhna taihta chariah adyuhpa nata pahniena to leipa ta, a kuasai beih leipa pho eima châ. Chariah manôh hluphi-khih kha chariah nata khih no aparaohpa chariahzy taihta a vaw pahnie tyhpa; hnôh asy beih leipa, samoh-sahlâhzy pi ta atanoh cha unawh pathôh dâhdeipa chhao pahnie thei khao leipa ta, eimâ rôh khei ngâthlâh ha chy.

Mahnô-mahpawzy hro lia mokhaoh cheingei ta maniah vaw hmô thei ei sala cha; khatlu chhôhso lôhpi pasa aw vâ!! “Sahrâhpa ta sahrâhpa pathla ta, theihlu kô liata theihropa pathei beih vei” tahpa biephôhzy cha Marapa châta a châ leipa nata yzie a hneileipa a vaw châ ngyu aw. Unawh papangawh-Tlôsaih, Chapi, Zyhno, Hawthai nata Vyhtu zy pi ta unawh pathôh chhao eima pahnie thei leipa he eimâ pôhkha lei vâ nata keimo liata ngâchhihna eimâ pahla vâta a châ ngyu aw.

Cha unawh pathôhpazy cha – a uhthei chaipa CORRUPTION, aliahpa FOREIGN TONGUES nata aseihnai chaipa AIDS zy he ama châ.

He unawh pathôhzy he apôhkha ngaita kaw ei ta, kyh chhao amâ pachâ kaw. Marapa pakha tu awpa ta mopakha ta a pahnie thlâh awpa chhaota mo pathôh ta a bao pasu cheingei ta, ama pathôh kuhnie pathla thlu chy awpa he amâ chhuahpa a châ. Marapa pi hra cha adyuh hri awpa hlâta âmo khiahma eimâ châh via tah thei awpa eima lyu. A chhâpa cha thapi

phia byuh leipa ta rainao kawpa ta thlai maniah ama pahnie thlâh ha tyhpa vâta a châ. He unawh pathôh chô liata Marapa ta pahniena poh azawh beih aw nahta pangiasa achhih khao vei. Khihpi liata a y pha leipa nata hâra dyhchhiepa Marapa manôh pakha chhôhso liata la, hy Mararâh ngiachhie chhi, mahnô-mahpawzy laizao laona tahpa ta mokhaoh lia raithlih vatie ti hawhta a loh ngâthlâh ha chy.

Pahnie thei lei Mara chariahpa - unawh pathôhzy ta maniah amâ dyuhna nata pahniena poh ama zawh dâh eima za pahri-paziah tua aw :

1. **Uththei chaipa CORRUPTION** thâti nata raihriazy: Corruption he Mara sawzy hlâta uththei via syulyupa châ ta, khatita ma eima râh â vaw ngia tahpa pahno awpa châ vei. Mararâh â vaw ngia awpa no ta a palôhrupa phao dâh cha a thlachhiena nata riahchhiena ta a bie.

Châhrasala â pangiasa lei kawpa ta Marapazy pi ta avaw ly pi ta, eima hro liahmaripa maniah palysa tlôh leipa ta, a y leipa ta eima y thei lei chaipa a vaw châ haw. Corruption heta eima râh angia âryh kawpa vâta nata eima padao-pahlia thai kawpa vâta a nawhta nawh pano chhao a hnohta y hra awpa ta bie ta ta, ama pathôh ta atahmâ la liahsa tlai ama vaw pitloh khai ha bâ.

Marapa chi pangawh-unawh papangawh y pi ta, ahyma corruption he a chhôhkha via pahno thei awpa châ ma pi. Eima daodo dâh pachâpa ta a no Corruption tlai chhao ta khokhei patluapa maniah hnei thei hra vei. Corruption he thâchhie avao khoh lei kawpa a châ. Dyhchhie chaipa tawhta hneirôh chaipa taihta âlyupa ta kyh a pachâ thei thlâhpa a châ. A viasa Marapa hro reizie ta a hmiachâ (nozana pahnolei) kaw ta, a châhta noza a pasôh kaw hra. Chyhsa y chakhyh thlâhpa hnohta ama hrozie chapao-chapoh ngaita kaw ta, nôpawzy ta a viasa pathupa a pahno-pahlie zie reihpasia n'awpa ta – 'ti nata nga hawhta ama châ' ama vaw tah tyhpa hawhta hmoto ahly ei ta, chyhsa ngâchhih viapa hnohta lâpi biechho deita hawhta hmia amâ pahno hra. Noza pasôhpa (Ngâchhih-asia viapa) ta achyh via; hmiachâpa (sialeipa nata ngâchhih leipa) ta a hluh via hriana râh a châ.

Chyhsa haihthai kawpa châ ta, pakah-paleih asaomâ kawpa nata aphih thei kawpa a châ hra. A mothlih aphoh kawpa châ ta, a pachyh-paryh chhielie leipa chhao ta, mothlih a pathla thei. Chyhsa papyu-pahly thai kawpa châ ta, vâtlâh nata sawhkhâ hmobaoh chhao a mohôh pha kawpa vâta daihti rei leipa liata cha ano ta hawhta a pachâ pâ ha tyh.

Athaipazy reizie ta cha Corruption he 'Omnipresent' a châ ama tah. A yzie cha suto-râhto liata a y thlâh hapa tahna a châ. Siku liata y ta, office liata y ta, sôhdaohna liata y ta, âhmie zuana lia chhao. O sana liata y ta, Awnanopa liata y ta, Awnanopa ry liata fellowship deppt.tlyma Board liata y ta, election lia chhao. O hri-lyupa hmopiena liata y ta, nôpi-nôvah liata y ta, kyhpachâna veihla-lyuhbie ahlâna lia chhao. O hmo-lyu hmo kyh liata chhao chyhsa peimawh chaipa châ ta, lyuhchâna lia chhao. Mistiri hnohta atyu pâ ta, tailoring daoh liata angia ha hra ta, contract chhao vâro tlai a hria ha bâ hra. A ! A rainaona zie ta raihriana su to nata manôh to yna liata tah ei sih la, eima reih pasia via ngyu na.

2. **Aliaha FOREIGN TONGUES** thâti nata raihriazy : 'Foreign tongues' tahpa ta a moh bi chhâpa cha Mara reih a châ leipa-mongyuh reih, tlaikao reih nata reih hropa pasâhsa tu ha ta, a pina râh reih nata a reih chei khoh lei kawpa chyhsa a châpa vâta he moh he binâ chhâpa a châ. Mararâh he reih no-eih hrâhpa a hneipa nata chi nata pho kha ta reih awpa a châpa vâta District Council chhao eima hmô pâ ngâpa a châ. Chyhsa hmiatuapazy kha tlaikaopa (mawpa) tlyma mongyuhpa tlyma châ ei sala cha he Mara Autonomous Distict Council chhao he a vaw pih nahta pangiasa achhih tiarâh vei. Mara reih a châ leipa; reih hropa zydua cha Foreign tongues chhôh liata eima soh khai thei aw. India nata Mawrâh liata a ypa châ hra ei sih la, râh eihpa a hneipa châ pi ta, Mararâh a châ leipa cha eima châta Foreign ama châ khai.

He aliaha foreign tongues heta Mara sawzy maniah âdyuhna dâh cha ânano kaw ! Hlâno daihti liata cha hmiahaopazy amâ dyuhna dâh cha rie patheisapa ta thiepa a châ. Atanoh deikua cha kyhpachâna ao chhaota maniah a dôvei ha bâ. Mara saw châ thlâh tlôh ta, mongyuh reih pasâhsa kawpazy, tlaikao reih pasâhsa kawpa zy eima hluh kaw bâ. He heta a hmâ n'awpa su nata daihti do kawpa pahly hlei vei.

MANIAH A PAHNIEZIE NATA EIMA DUASU LIATA PALÔH TLÂHLEINA TLÂHPIPAZY:

(a) Mongyuh reih nata mawreih ei pasâhsa kawpa hmo doleipa ei taopa cha, chyhsazy ta na pasi-pa-ao ei ta, châhrasala thai kawpa ta ei reihpasia tyh. Â reihpasia ngâthlâh ha hr'aw sala, a sia kawpa ta a reihpasia thei beih aw va na, tahpa eimâ my khai haw.

(aw) Adaihti nata noh cha pathlua thai awpa a pha. Keimo cha mongyuhpa nata mawpa hawhta eimâ tao pâ chhyh hapa cha noza âchhih kaw.

(y) Sahma paripa noza âchhih thlâ bao nahta, â mo ta a pahno leipa eita, tao thei, hriathei, tah thei kawpa hawhta amâ pachâpa kha a kiapâh liata chyhsazy ta khâpa sawta reih veih ei, tahpa â pahno leipa hawhta mongyu reih a thai kawpa nata maw reih a thai kawpa hawhta eimâ pachâ no khata, eima hnôhlâ tawhta maniah ama pahneisao ngâkaw na tahpa my khah ei suh u.

(b) Mongyuh reih tlyma, maw reih tlyma a pasâhsa kawpa he thai hmeiseih leipa a ma châ khoh kaw.

(ch) Reih hropa acheih tyhpa he râh a paphasaituhpa a ma châ.

(d) Marapa chhônkhata nata o tlaita reih hropa ta bie achho tyhpa ei he chyhsa nohkhah leipa y zie a châ.

(e) Zawpi a hmaohpakhyna liata Mara reih pasâhsa awpa ta apachu tyh pi ta, daihti a chhâ pataw nahta biereih tuhpa cheingei chhao khata hmâhpazi khao tyh vei.

(f) Mara reih cheihchalo byuh zie nata Marapazy pi ta a pabohsana rai eima hria n'awpa dâhzy thâthbu nano nanopa liata a thaipazy ta rohpa ta papua tyh ei ta, châhrasala reih hropa a pasâhsatuhpazy ta reih beih veih ei. Ama yna cha thâthbu nata phia ta tlô beih hra vei.

(h) Marapa ta sapa nata thlahpa ta eima office lia cheingei chhaota Mara reih chei n'awpa su a sôhkhiah kaw bâ. He hawhta a sôhkhiahpa dei châ leipa ta, hriatuhpa cheingei chhao kha Foreign tongues ta KEI (unawh) ta âtaopa a vaw châ ha bâ.

(i) Marapa nata Marapa chhaota reih hropa ta bie eimâ chhopa dei châ leipa ta, Marapa ta chyhsa bie â chho daihti liata reih ahmâh tuachaipa cha Mara reih châ vei.

(k) Chyhsa pathôn tawhta a chô lâ eima y khoh daihti liata a hluhvia Marapa châ hra ei sih la, mopakha dâhdei chhaota reih hropa a cheihpa a y khiahta cha a reih ta bie eima lôhawh tyh.

He tlupo ta Foreign tongues heta maniah pahnie ta, ado ma pi tahpa eimâ pahno thlâh hapa chhaota reih ngâh khao ma pi. Cha liata riahpha kawpa ta eima reih khiahta cha ahrupa nata chyhsa palôhki leipa châna hlao aw pi ta, chyhsa to maochhiepa ta eima y aw. Eima tovyuh phapa chhao maniah ama chhu khai aw. Foreign tongues cha reilei, keimo nata keimo cheingei ta Foreign tongues chhâh châpa vâta eimâ thiesao khoh aw.

Chi hropazy ta ama reih ama pasâhsa zie a chyusia kawpa ta sâkha vaw palâsa tua sala. ECM KTP Pakhyipi ei 61- na Zyhno liata âchahâ nota Ryureina (6th Febreuary 2015) liata agenda pachâ ngâhai no ta, pachâdâh nata hmôdâh reih hra awpa ta LIKKB deligates tawhta (pano) pakha hruapa châ ta, a pachâdâh cha kheihawhpa rai vaw châ ha hra sala, eima pahnothai kaw awpa hlâ ta cha kheihata ma ei reih ei phualuah thei aw tahpa pachâ ta, Lai (lia) reih palâhâhna daihti rypaohpa châta hmâh ta, a reih chhôn zydua ta ama reih sai ta a hmâh. Ryureihpa manôn zydua su 10 pachhai ta su 1 dâhdei chhao hmahta kha a reipa yzie kha eima pahno thai nahta pangiasa va na.

Châhrasala tlaikao reih ta tlyma Mara reih ta tlyma cheihpa ta eima pahno thai kaw awpa cha ano pachâ ta hmo sôh chaipa nata peimawh chaipa châ hlei vei. Keimo châ heih tua ei sih la cha tlaikao reih hmâh heih aw pi ta, eima biereipa word zydua cha 500 châ sala, 150 cha mongyu reih word a châ heih cheingei aw.

Cha leipa zydua cha tlaikao reih a châ aw. Kha saw kha pasâhsa na ta, a bierei ngâhaino ta a y dâh cha ei mothlaw ta zâhnia tahpa hlâ chhaota a thieh via. Kha paw hawhta Marapa zydua châ khai ha ei sih la, he Foreign tongues cha reilei a uhta nata nawhta chhao he nohtla hlâta eima pahnie cheingei aw.

3. A seihnai chaihpa AIDS thâth nata raihriazy : AIDS he eima hmiahaopa hry liata seihnai chaipa a châ. Kô 1959 liana khata Europe nata Africa liata vaw pih ta, kô 1981 liata USA lâ sie ta, kô 2000 chô tawhta cha eima râh liata a uhta Corruption ta bieta ta, a kaw tlôpa a châ. Ano he chapaw nata chapaw chaozuahna nata chaozuahna hrahro tawhta a vaw pihpa nata laiseihpa a châpa vâta a vaw pina moh cha GRID (Gay Related Immune

Deficiency)taha a châ. Châhrasala kaw laiseih ta, a hrozie ta a nô nata pawzy, uhtazy a lyu thai kawpa vâta kô 1983 pa khata a thâti achutuhpa nata HIV hmôpapatuhpa French Scientist Luc Montegnier nata viasazy ta moh thiehpâ AIDS tahe vaw bi ei ta, atanoh taihta he moh he a vaw phaoh lymâ chy. Ano he a uhta nawh hawhta a pasasa hapazy cha tlâhna hmô thei mâh to veih ei.

AIDS he a hmi pha kawpa, kho apao kawpa, veihlâ lyuhbie hlâ thai kawpa a châ. Satlia nata laihsa likah dei chhao châ leipa ta, nôva likah liata chhao â chahraoh lymâ hra. AIDS a khoh hapa nata kyh a pachâ hapazy cha pua thei khao veih ei. Khizaw sawhkhâ athaipa chhao ano tawh heta ahyhmah ta pachhana bie tlâhna hmôpapua mâh leipa ei ta, AIDS khoh kaw tlôh ta; amo hmô tawhta ahlapi ta y achhuah hapazy châta hropahsisana dâhdei Anti-retroviral drug hmôpapa a châ. He he AIDS my pathlahna tlyma a hniehnôh pathaisa khaina châ leipa ta, hro pahsisa chyna dâhdei ta a châ. Amâ ru kaw ta, dyhchhiepa ta cha chalei thei'pa rimâ châ vei.

AIDS - Mara sawzy ta eima vâ-iana dâhzy:

(1) Tlâhle daihti liata thisaih pathaih leipa daona nata syrine pathaih leipa a hmâpahlaona tawhta.

(2) Chanô-chapaw châna tawhta. (3) Apahnâ (asyna)tawhta. (4) Drug taona tawhta.

(5) Saw phaohna tawhta. (6) Nô hnôti daona tawhta. (7) Tattoo nata a hropazy tawhta.

Unawh pathôh penawhzy pahnie n'awpa dâh :

Eima râh cheingei liata sei ta atâh pi ta, sei ta eimâ tâhpa he eima palôh â ly kawpa ta ei pahno. Tilaipi saiha chaka chy ta Izarei sawzy Izi râh a ma vâ pakhuapa hawhna khata seichâna tawhta eima pua tita, seichâna kha vâ khao khah ei suh u.

Eima râh cheingei liata tlybaipa ta y pi ta, a ry lâ tawhta eima kaw pahneih ngâthlâh ha chy aw mâ ? Unawh papangawh châ ma pi mâ, keimo mopakha ta hmahta eima khona lâ cha thina taihta ngâhpa ta eima riahpha vei ma khâ ! Cha leipa ta sei liata atâhpa hawhta ma eimâ pachâ vei tly i ! A ry lia tahpazy he athei ngâthlâh ha ei suh u.

(1) Abeipa pahnopa ta chi awpa : Ato liata maniah pabohsa thei awpa cha Abeipa a châ tahe pahnopata Abeipa chi ei sih la, hmo phapa nata pathaihpa deita he hria bâ ei suh u.

(2) Ngâchhihna nata siana hmeiseih hnei awpa : Atahmâ ta eima ngâchhihna nata siana heta pahnie thei khao aw ma pi. Atahmâ ta eima siana nata ngâchhihna he cha âlâpa lia deita a thatlô tahe pahno bâ ei s'u. Corruption he chyhsa so ngaitapa châ ta, a ru lâta chyhsa dôvei tyhpa a châpa eima pahno khaiha kha. Ei kha dôpa ta eima ypa he dôveituhpa do leipa châ ta ei no dôveipa ta eima y khahta cha keimo do leipa a châ aw.

(3) Kyhpachâna hmeiseihpa nata apôhkhana: A unawh kyh a pachâ leipa cha chhiesapa ta y mawh sy tahe hawhta, chhiesapa ta eima y lei n'awpa ta kyhpachâna hmeiseihpa ta kyh a pachâpa ta a pôhkhâ ngaita bâ ei suh u. Thyngawh hmahta eima khô leipa tlaita kyh eimâ pachâ thei leipa he maluh pôh via ngâ awpa hmahta châ vei dia maw !

(4) Tiamapa ta hriapasa awpa : Manôh to nata chhôhto ta ativy kaw ei sih la, he unawh nawhzy liana heta abôh khao beih aw ma pi. Chavâta atahmâ ta eima hmahdawzy athei thlâhna chôta tiama ngaitapa ta hriapasa ei suh u.

(5) Maopahna a pahno ei suh u: Châthaipa, Evangelist, Pastor, Officer nata politician zy pi heta zawpi hnohta bie a reih hlüh viapa eima châpa vâta keimo he eima peimawh kaw. Lyutaopa ta alyupa (lyu hri) lia deita a pachâna pasohpa cha chho thei ta, nâma nata keima deikua cha manôh zakha nata a chôlâ syulyuzy ta eima biereipa nahthlie tyh veih ei mâ, tahe he athei ei suh u.

Eima thei na chy papuapa ta teiparaoh awpa a châ. He hleikhô ta reihtuhpa zydua keimo liata adyuh n'awpa dâh eima pahnopa zydua chhao hmâpa ta he unawh pathôhpazy he pahnie cheingei achhuah ei suh u. Eima râh paduapathi awpa ta ahyhmah ngâ achhih leipa ei ta, chho awpa y hra veih ei, tahe pahno thlâhna chôta kyh a pachâ ei sih la, pawpi khochhi ngaitapa hawhta avaw pawh awpa cha samoh-sahla zy châta mylâ châ leipa ta, tavia châ hra leipa ta, atanoh nata atahmâ tlai he hria pathao para bâ ei suh u. Thiapawh tlai chhao kha

eima sapa nata thisaih azaopa Marapa cha UNAWH PATHÔHZY tu saopa vâta THLÂ SU lâ
chihtha ha heih vei ei mâ !!